

## Cci su corna e corna

Li corna ‘ntesta a ‘n’animali  
è na cosa cchiù chi nurmali,  
ma n’omu ca l’avi ‘ntesta  
significa ca cci ficiro la festa.

Prima di diri ca l’atri hannu li corna,  
taliati la to testa si cci vidi la forma.

Cci fu unu chi dissì:  
<< Tutti li fimmini su piccatrici,  
menu me matri e me soru. >>  
Iddu fu lu primu curnutu  
primiatu cu na midaglia d’oru.

Si na casalinka pecca,  
lu maritu ammazza l’amanti  
e po s’impicca.

Si na mugliera fa adultèriu,  
lu maritu ammazza a idda  
e po commina un putifèriu.

Si na picciotta tradisci lu zzitu,  
lu zzitu si nni fa trent’anni  
pirchè di la gilosia fu aggreditu.

Si n’attrici nun n’avi n’amanti  
ancòra nun nne divintata ‘mpurtanti.  
‘Nveci si n’avi unu,  
cumencia a èssiri quarcunu.

Si n’avi sei e setti  
diventa diva ‘mpurtanti  
e nni pàrlanu giurnali, rai e mediasetti.

Lu munnu è fatto a la riversa.  
La piccatrici semplici veni disanurata  
mentri la diva ‘mportanti veni anurata.